



QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM,

Die Jovis decimâ septimâ Februarii 1707.

M. PHILIPPO FONTAINE,
DOCTORE MEDICO,

PRÆSIDE.

An obliqui oculorum musculi retinam à crystallino removeant ?

I.

LUMINE nihil sensui clarius, nihil menti obscurius. Non pauca tamen ejus affectiones duce experientiâ detectæ. Secundùm lineam rectam diffunditur. Eandem semper insistit viam, nisi reflectatur corporum duræ & opacæ molis objectu, aut diversæ raritatis media trajiciendo frangatur. Anguli incidentiæ & reflexionis sunt æquales. Cum lumen è medio rariori in densius obliquè transit, refringitur accedendo ad perpendicularem: ubi è medio densiori in rarius commeat, illius refractione fit per recessum à perpendiculari. Pro variâ mediorum raritate aut densitate, juxtaque diversam radiorum luminis inclinationem plùs minùsve refringitur lumen. In iisdem mediis eadem est ratio sinuum angulorum inclinationis ad sinus angulorum refractorum. Quodcumque objecti aspectabilis punctum quoquè versùs innumeros luminis radios mittit, eosque divergentes. Qui ex eodem puncto emissi pupillam ingrediuntur, conum efformant. Dum oculum pervadunt, varios offendunt diversæ densitatis humores. Soli perpendiculares radii irrefracti viam pergunt, cæteri in singulis humoribus franguntur, & sic fiunt convergentes, ut sese in puncto non ita remoto interfecerent. Post ultimam refractionem alium conum efformant, cujus vertex est punctum concursus. Ex his duobus conis, directo scilicet & refracto, componitur penicillus opticus. A diversis punctis diversi oriuntur penicilli, quibus objectum in retinâ depingitur. Hæc si penicillorum apici occurrat, distincta est imago; si verò ultrà eorum apicem sistatur, vel si crystallino sit vicinior, quàm radiorum coalitus, confusa est objecti delineatio; tum enim

radii, qui ad diversa objecti puncta pertinent, concurrunt in eâdem parte retinæ, & qui ex eodem puncto emanant, diversas retinæ partes afficiunt. Radii ex eodem rei vicinæ puncto emissi, magis divergentes sunt, quàm qui ab objecto remotiori proficiuntur: hi ergò propius crystallinum, quàm illi coalescunt; idèd si retina sit ad conspiciendas res distitas aptè collocata, ut proximæ videantur, eam à crystallino removeri necesse est.

II.

UT ratio evincit radios è loco remoto profectos, ad minorem distantiam, post refractionem uniri, quàm qui è vicino prodeunt; ita illud multiplex experientia demonstrat. Si vitro convexo chartam duplici foramine pertusam glutine affixeris, & ex unâ parte objeceris facem, ex alterâ verò radios per foramina trajectos exceperis chartâ albâ; parebit eos ad majorem, vel minorem à vitro distantiam coalescere, prout fax propior, vel remotior fuerit. Convertatur oculus artificialis ad objectum aliquod illustre proximum, & sic retina collocetur, ut ejus distinctam imaginem excipiat: si postea dirigatur iste oculus ad aliud objectum remotius, hujus imago confusè delineabitur in retinâ, nisi ipsa ad lenticulam vitream in oculo conclusam admoveatur. Idem in hominum oculis accidere probant malo suo fato Presbytæ ac Myopes. Hi res vicinas distinctè vident, remotiores confusè; id vitii pariunt cornea, aut crystallinus convexior; tum enim radii nimidum inflectuntur, propiusque crystallinum coeunt: unde cum objecta remotiora spectant Myopes, retina non potest usque ad radiorum coalitum accedere: specillis concavis uti solent, quorum opè radii dispersuntur, & ita longè à crystallino concurrunt, ut si ab objecto vicino proficerentur. Contrarium est Presbyterum vitium; res eminè spectatas cernunt distinctè, propinquiores non item. In illis vel crystallinus humor non satis turget & majoris sphaeræ segmenta æmulatur, vel exsiccatis fibris trahuntur introrsum oculi. Hinc radii ab objecto vicino profecti longius à crystallino coeunt, quàm ut ad eorum concursum removeri possit retina ossibus cranii impedita. Magno sunt ipsis adjumento perspicilia convexa, quibus radii efficiuntur minùs divergentes, adeo ut tam propè crystallinum colligantur, quàm si ab objecto remoto prodirent. Eodem vitio laborarent cæteri homines, si immota sisteretur retina, ubi concurrunt radii ex objecto sex pedibus v. g. distante manantes; tum enim radii ab eo, quod distat tribus aut quatuor digitis, profecti, non nisi ultrâ illam concurrerent: (objectorum autem plus quam sex pedibus distitorum radii ad eandem ferè distantiam coalescunt.) Ut ergò res proximæ conspiciantur, retinam esse oportet remotiorem à crystallino, non quidem hujus accessione ad pupillam, cum ad eam quantum satis est accedere nequeat, sed retinæ à crystallino recessu.

III.

DIVERSARUM partium elegantissimâ compage contexitur oculus; omnes ad ejus functionem conspirant, sed non ex æquo; unde non eadem est illarum utilitas & dignitas. Primum locum sibi vindicat retina, quæ ex nervi optici interiore substantiâ quasi expansâ constat, & primum visionis instrumentum censi debet. Proximè sequuntur humores, aqueus scilicet, crystallinus, & vitreus: his radii luminis franguntur, ut in retinâ con-

current, & objectum delineent. Membranis continentur humores ne diffuant. Præter retinam & tenues illas, quæ crystallinum & vitreum humorem involvunt, tres membranæ recensentur, adnata sive conjunctiva, sclerotica & choroeides. Sclerotica à parte anteriore ob pelluciditatem cornea nuncupatur. Choroeidis pars anterior, etiam mutato nomine, appellatur uvea: in hujus medio foramen est pupilla dictum. Suos habet musculos ad motum oculus; sex in humano numerantur, quatuor recti & duo obliqui. Fibris musculosis instructa est uvea, quæ pupillam modò contrahunt, modò dilatant. Ex oculi motibus quidam observantur, quidam ratione tantum deducuntur. Conspicua est axium opticorum versùs diversa objecta directio, quâ efficitur, ut horum imago sit magis distincta. Patet etiam pupillæ dilatatio, ejusque restrictio ad plures, vel pauciores radios, pro vario objecti fulgore admittendos. Quicumque alii motus oculo, vel ejus partibus tribuuntur sub aspectum non cadunt; talis est assertus retinæ à crystallino recessus. Hujus causam si requiras, partes oculi recensitas expende: nulla præter obliquos musculos ita comparata est, ut hunc motum possit edere; ipsi verò structuram habent ad illum efficiendum maximè accommodatam; neque aliud quidquam eos præstare existimaveris.

I V.

OBLIQUORUM musculorum alter, minor vocatus, circà majorem oculi angulum exoritur; per infimam partem delatus ad angulum externum tendit: alter major vel trochlearis dictus prioris est antagonista; originem ducit ab oculi fundo, dein rectà fertur versùs majorem canthum, & per trochleam trajectus, ad partem supremam oculi reflectitur, desinitque ultrà musculi recti attollentis tendinem. Contrahuntur simul hi duo musculi, & oculus, quem constringunt, in longum producit, imminutâ latitudine, atque adeo retina à crystallino removetur. Non in alium usum facti videntur isti musculi: nam quod aiunt, eos seorsim agere, ita ut alter ad angulum internum, alter ad externum oculos in gyrum circumagant, commentum est: si enim per hunc motum intelligant oculi agitationem circà axem opticum, fictitius est hic motus, oculorum functioni omnino inutilis, nec ullâ unquam attentione observandus: nunquam enim ad latera deducuntur supremæ & infimæ oculorum partes; si per hunc motum designetur axium opticorum directio in gyrum, vera hæc est & conspicua; neque enim integrum modò gyrum, sed plurimos quoque secundum eandem determinationem perficere oculus animadvertit; sed manifestum est hunc motum à musculis obliquis non produci; neuter eorum, etiamsi solus ageret, per circuitus mediam partem oculum posset convertere; à quatuor musculis rectis dependet iste motus: hi ducunt originem à margine foraminis, per quod orbitam ingreditur nervus opticus: eorum tendines lati & tenues in corneam inferuntur; si seorsim agant, axem opticum oculi sursum, deorsum, ad dextram vel sinistram ducunt; cum duo vicini simul æquas vires exercent, axem movent ad æqualem ab utroque distantiam; ubi alteruter fortius trahit, ad eum axis accedit magis, cujus actio est potentior; omnium successiva contractio axem opticum in gyrum, seu circumulum dirigit.

CRYSTALLINI humoris figuram mutari censet Cartesius, eumque magis, aut minus convexum evadere pro variâ objectorum distantia: sic quidem rerum tam vicinarum quàm remotarum imagines in retinâ immotâ distinctè exararentur. Verùm hæc crystallini mutatio fieri nequit nisi per ciliares processus, qui tenuiores sunt, quàm ut comprimant humorem hunc spissum, & arctè vitreo coherentem; ad pupillam potiùs traherent crystallinum, quàm ejus figuram immutarent; hæc enim ligamenta ad uveam sunt inclinata, cùm ex totâ crystallini circumferentiâ desinant in chorocidem ad uveæ ambitum. Insuper crystallini figuram exquisitè sphericam esse oportet, ut radii colligantur; per tales autem mutationes humor iste pluribus stratis invicem superpositis constans exasperaretur rugis, vitiatâque ejus figurâ nihil nisi confusè videretur. Stat ergò inconcassum retinam à crystallino removendam esse, cùm oculus ad distitas res videndas compositus convertitur ad objecta proxima; quod soli præstare possunt muscoli obliqui; hicque proprius est ipsorum usus. Cùm enim oculi præcipua pars sit retina, cæterarum oculi partium usus non modò ex earum structurâ desumendus; sed etiam ex auxilio, quod conferunt, ut retina debito modo afficiatur. Si confertis viribus agant, & oculum constringant obliqui muscoli, retina à crystallino ita recedet, ut in concursu radiorum ab objecto vicino proficiscentium existat, idèdque illam non mediocriter juvabunt ad munus obeundum; si alteruter solus ageret, oculum quidè converteret circa axem opticum, sed per hunc motum nullam opem retinæ adferret; idcirco musculorum obliquorum usus est oculum constringere, & in longum producere, non verò circa axem opticum movere.

Ergo obliqui oculorum muscoli retinam à crystallino remonent.

Domini Doctores disputaturi.

M. Claudius Bourdelin serenissima Principis Burgundia Medicus perpetuò ordinarius, & Regia Academia socius.

M. Petrus Joannes Burette à Regiâ Numismatum Academia.

M. Ludovicus Poirier, Facultatis Decanus.

M. Joannes Franciscus Foy-Vaillant à Regiâ Numismatum Academia.

M. Ludovicus de Vaux.

M. Petrus Bonnet Bourdelot Primarius serenissima Principis Burgundia Medicus & Regia perpetuò ordinarius.

M. Alexius Listre Regia scientiarum Academia socius.

M. Petrus Marais.

M. Renatus le Comte.

Proponebat Parisiis ALEXANDER LE FRANÇOIS
Parisinus, Baccalaureus Medicus. A. R. S. H. 1707.

Typis Viduæ Francisci Muguet, Regis & Facultatis Medicinæ Typographi.